

27/01/2001

Shaikh Khalifa lawat Malaysia tiga hari mulai Isnin

KUALA LUMPUR, Jumaat - Perdana Menteri Bahrain, Shaikh Khalifa Salman Al Khalifa, akan mengadakan lawatan rasmi tiga hari ke negara ini mulai Isnin ini, bersama 55 anggota rombongan termasuk empat menteri.

Wisma Putra dalam satu kenyataan hari ini, menyatakan lawatan itu adalah atas jemputan Datuk Seri Dr Mahathir Mohamad, yang juga sebagai membalas lawatan Perdana Menteri ke Bahrain pada 1997.

"Lawatan ini akan membuka ruang kepada kedua-dua pemimpin untuk memperbaharui hubungan peribadi. Kedua-dua Perdana Menteri akan mengetuai delegasi masing-masing bagi membincang cara untuk memperluaskan lagi kerjasama di antara dua negara yang bersahabat.

"Kedua-dua Perdana Menteri juga dijangka membincang isu-isu serantau dan antarabangsa," kata kenyataan itu.

Malaysia dan Bahrain dijangka menandatangani memorandum persefahaman (MOU) untuk menubuhkan Suruhanjaya Bersama yang akan membuka ruang bagi kerjasama ekonomi dua hala yang lebih meluas.

Shaikh Khalifa juga dijangka menghadiri jamuan malam yang dihoskan oleh Dr Mahathir dan juga Yang di-Pertuan Agong.

Perdana Menteri Bahrain itu juga akan dianugerahkan "Grand Commander of the Order of Defender of the Realm" oleh Yang di-Pertuan Agong dan ijazah doktor falsafah (PhD) kehormat dalam sains politik oleh Universiti Islam Antarabangsa (UIA).

(END)